

## SANDE 5 BILONG LEN

*(rem (Ol i nil daun na pre liklik.)*

### 1. RIT

**Ais 43:16-21**

*Akar dapanim: Ia bizir igiar damuamimin bagh gan. Ki dipabar amighti da danganir kabagh ivemarti, gumazamizir ni uabaghavira inabziba, me anere mam.*

**Akar kam, Godin akam inigha izir gumazim Aisaia, an osiri.**

Ikiavira Itir God ghaze,  
“Ki fomira ongarir bar ekiam  
tongiram anebigha tuavim ati.  
Egha ki midorozir gumazir aviribagh  
amizi, me uan karisba ko hoziaba  
sara tuavir kamin ghu,  
egha me bar ikuvigha egha ua  
dikavizir puvati.  
Me mati gumazim lam giverazi a  
zuamira mungue.  
Ezi datirighin ki ghaze,  
Ia bizir ki fomiram amizibara,  
nighnighan marki.  
Ia gan! Ki bizir igiam damuasava ami.  
Ezi bizir kam a datirighin otifi, ezi  
ia ti an ganiz ti puvati?  
Ki danganir misingizibar tuavibar  
ingariva,

egh ki dipabar amuti da  
gumaziba puvatizir danganir  
kamin ivemaram.  
Nan gumazamizir ki ua bagha  
miseveziba, me dipabar amasa,  
ki dipam damighti a danganir  
misingizimin otoghti,  
bizir kam bangin asizir atiaba, afiar  
atiaba, ko poneba ziar ekiam na  
daningam,  
Gumazamizir kaba, bar akuegh egh  
nan ziar ekiamin gun mikimasa,  
ki ua bagha men ingarigha me  
gamizi, me nan adarazir otifi.”

**Kar Godin Akam.**

### SAM

**Sam 126:1-6**

**Ia akam ikaragh: E Ekiamin ingangariba bagh bar akueghaghm.**

Ikiavira Itir God uam e inigha Saionin nguibamin ize,  
ezi dughiar kam e ghaze, e mati irebamin gari.

**Ia akam ikaragh: E Ekiamin ingangariba bagh bar akueghaghm.**

Kamaghin, e akava ighiabagh amuavira iti.  
Ezi kantrin igharazibar gumaziba e migia ghaze,  
“Ikiavira Itir God, Israelian akurvaghasa maburan ingangarimram ami.”  
Bar guizbangira, Ikiavira Itir God en akurvaghasa bar ingangarir ekiam gami,  
kamaghin e datirighin naviba deragha bar akonge.

**Ia akam ikaragh: E Ekiamin ingangariba bagh bar akueghaghm.**

O Ikiavira Itir God,  
Ni ua deraghvira e damuam.  
E mati dipaba puvatizir danganimin itir faneba dipaba dake,  
ni amozim damighti a ua iziti da ua izevegham.  
Kamaghira, ni e damuti e izivagham.  
Gumazir aravira dagheba opariba,  
me dar dagheba iniva bar akuegh dimiva arangam.

**Ia akam ikaragh: E Ekiamin ingangariba bagh bar akueghagham.**

Guizbangira, gumazir aravira dagher oviziba atera ghua da opariba,  
me dar dagheba inigh uamategh ighiabara amu da ater izam.

**Ia akam ikaragh: E Ekiamin ingangariba bagh bar akueghagham.**

## **2. RIT**

**FI 3:8-14**

*Akar dapanim: Nguazir kamin bizir aghuiba da pura biziba, ki kraisin suiragh  
gavgavigham,*

**Akar kam, akinafarir Pol Filipain gumazamiziba baghava an osirizimin aven  
iti.**

Ki Judan bizibara migeir pu. Puvati.  
Ki Krais Iesus gifo a nan Ekiam, ezi  
ki fofozir kam ginighnigha ghaze, a  
guizbangin bizim, ezi nguazir kamin  
biziba bar pura mineziba. Ki Kraisra  
gin mangasa ifonge. Egha bizir  
igharaziba bar da ategha, egh ki Kraisin  
suiraghiva, egh a ko bar porogh ikiam.  
Ki Moses Osirizir Arazibar gin ghua,  
gumazir aghuimin otivasa nighnizir  
pu. Puvati. Ki tuavir igharazimin ghua  
Godin damazimin derazir gumazimin  
otogham, nighnizir gavgavim Kraisin  
itir tuavim. E nighnizir gavgavim  
Kraisin itima, God uabi ghaze, e an  
damazimin dera. Ezi ki Krais bar a  
gifoghasa. Krais mozimin ua dikafi,  
egha a gavgavir ekiam iti, ezi ki an  
gavgavir kam gifoghasa. Egh ki a ko  
mizaziba isir arazimin aven ikiam. Egh  
ki, nighnizir a suiragha ikia ovengezir  
kamra, ki uaghan an suiraghasa. Egha

kamaghin ki nighnisi, God uaghan na  
damighti ki mozimin ua dikavighiva  
angamra ikiam.

Ki kamaghin nighnizir puvati,  
ki Krais Iesusin arazim inigha gifa,  
egha ki gumazir aghuimin otogha gifa.  
Puvati. Ki zurara ingangarir gavgavim  
gamua arazir kamin suisi, mati Krais  
nan suirazi moghin. Nan adarasi, ki  
nighnisi, ki arazir kam tighar a iniam.  
Ezi ki nighnizir vamira iti, ki fomira  
itir biziba gin amadagh, egh gin na  
bativamin bizim inisi a bagh mighin  
ingaram. Kamaghin ki ivemarim givaz  
naghin otoghiva egh ivezir aghuim  
iniasa, egha ki ivemaravira iti. Ivezir  
aghuir kam a kara. Krais Iesusin  
ingangarimin tuavimin, God nan dia.  
Eghti ki an Nguibamin mangiva a ko  
bar deravira ikiam.

**Kar Godin Akam.**

## WELKAMIM GUTNIUS

*Ekiam Krai Iesus, e nin iziam fa iziar ekiam ni ganidi.*

Apangkuvir arazim ko navir amirim na gizifa. Ezi ia guizbangira uan navibagh iragh na bagh iz.

*Ekiam Krai Iesus, e nin iziam fa iziar ekiam ni ganidi.*

## GUTNIUS

**Jo 8:1-11**

*Akar dapanim: Ian tongin gumazitam arazir ikuratam damigh kogh, a faragh dagiatam amizir kam mikinigh.*

**Ia, Krai Iesusin Akar Aghuir Jon osirizim, a baragh.**

Ezi Iesus Olivin mighsiamin ghu. Ezi aminim tirazi, ezi bar mizaraghara a ua Godin Dipenimin miriamin aven ghu. Ezi gumazamiziba bar a bagha izi. Ezi an aperaghav ikia men sure gami. Ezi Judan arazibagh fozir gumaziba ko Farisiba me pam itir amizir mam, me an garima a gumazir igharazim ko akui, ezi me an akua ghua egha a gamima a gumazamizibar damazimin tughav iti. Egha me kamaghin Iesus migei, “Tisa, pam itir amizir kam, a gumazir igharazim ko akuima, me an gani. Ezi Moses Osirizir Araziba kamaghin migei, e dagiaba fiva kamaghin amir amizim mikintima an aremegham. Ezi ni manmaghin migei.” Me ghaze, an akatam mikemeghti, me akar kam bagh akam a gasam. Egha me a gifarasa migirigiar kam gami. Ezi Iesus aviragha uan dafarpuzimin nguazim osiri.

Ezi me an azangsighavira iti, ezi Iesus tughha egha kamaghin me migei,

“Gumazir manam ian tongin arazir kuratam gamizir puvati, a faragh dagiam amizir kam mikinigh.” Ezi a uam aviragha nguazimin osiri. Me akar kam baregha, egha me bar vaghvagha danganir kam ataghragha zui. Gumazir ghuriba me faragha zui, ezi marazi men gin zui. Ezi Iesus uabira aviragha ikia iti, ezi amizim an damazimin tughav iti. Ezi Iesus tughha egha kamaghin amizimin azai, “Amizim, gumazir kaba managh ghue? Gumazir akam ni gasamiba ti puvati?”

Ezi amizim migei, “Ekiam, ua gumaziba puvati.” Ezi Iesus a migei, “Ki uaghan akam ni gasir puvati. Ni mangi, egh gin uam arazir kuratam damuan marki.”\*

**Kar, Krai Iesusin Akar Aghuim.**

